



Fasnacht 2025

Sans Gêne Alti Garde

Dr Byypagg-Zeedel 2025

Isch gnueg mit Gfasel, saisch: **HALT D SCHNUURE**,
das goht do z Basel, waisch, halt dure.
Hüt aber gilt glyy s brait Verbodd,
wenn D saisch, was isch oder gsait sy sott.
S foht a drmit – herrjeeminee,
ass kai Kind me jee e Fee wird gseh,
well d Fee, die ghört wie d Häx verbodde.
Wenn D frogsch, wiso die lätz syy sott:
Sy sin für s wyblig Gschlächt symbolisch,
was hütte für e Kind e schlächt Idol isch.
Ass Gnirps suggsch s mit em Schoppe yy,
s git Frau und Maa – dasch verbodde glyy.
Für Sii und Äär griegsch Du kai Laigg,
das git im Netz – he nay – e Straigg.
Oder schlimmer no: E Schitt-Storm dryfft Dy,
wie D nimmer joo De wettsch verschyfft syy.
Schrybsch lieber Ääääs zem d Wooge z glette,
zem wemme Dy sett frooge wette,
eb De d Astandsregle kennsch,
Dr nit grad s Muul oder d Hand verbrennsch.
Dr Winnetou griegsch nur no antiquarisch,
well däm sy Schmätherhand so n e exemplarisch
wysse alte Kolonialischt isch,
wo D am beschte uff e Misch gisch.
De dörsch au nümme Harry-Pottere,
ohni ass in dr Kommjunity alli schlottere.
Dr Globi git s nümm und au dr gstruublet Peter,
schlimm wie s Grimm's und gschwurblet am Meter.
Männertreu, s git gar nüt z Reede,
goht nit nur d Frau a, weiss hütt jeede.
Bim Frauemänteli frogsch intuitiv Dy,
was bitte sell dä Diminutiv syy?
Und elfdausig Jumpfere, wo n e Gäsli mache,
isch weder e Gspäsli no zem Lache.
Dr Pfaffehuet goht no katholisch,
bim Nunnefurz waisch, ass D frivol bisch.
E Waggis – s raubt mer fascht my Bsinnig,
git grad e diplomatische Verstimmig!
Arabi – feudo-militaristisch wie dr Stänzler,
machs pazifischtisch grad e Ränzler.

Das sin no glatti Zyte gsii,
wo D mänggmol wüschtsch wyterhii,
wo dr Pfarrer gsait het, was Moral isch,
Vo dr Kanzle und zwor paternalisch.
Das ka dr Vatikan hüt nümme stämme,
well die Buebe-Zygli z wörtlig nämme.
Drfür kasch jetz – dasch nit zem Lache,
d Moral inschta-snäbb-tigg-bugg-togg mache.
So wird jedes Blödel-Influänzler
Ze m e Model-Intelligänzler.
S het alles hüt vyyl künstlich Gwicht,
und isch e Mission, wie s jüngschti Gricht.
Machs e Stäärnli oder äggscht e Lugge,
s git in jedem Täggscht e Mugge,
wo nit gnueg schüssdifiziert isch,
ass immer ains diskriminiert isch.
Am beschte bisch duss mit Abstrahiere,
no ka me kai -Ismus extrahiere.
Dasch alles grangg bis epidemisch.
D Therapy isch Gott-sei-dangg nit cheemisch:
Mir gänn Euch schlicht d Empfählig ab:
HALT D SCHNUURE, grad wie s sälig Grab.
Blyb drfür fit und frey im Dängge,
no kasch das Sitte-Gschrey Dr schängge.
Und ass es nit vergässe goht:
Ab wenn s am Mäntig vieri schloht,
gilt s freye Wort – nit numme s Zahme,
wie s an dr Fasnacht isch halt – nundefahne!
S wird intrigiert und nit verdrägtt,
inschpiriert und mit Respäggt.
S isch möglich, ass De bös verschreggsch
und schreggligi Verstöss entdeggsch!
D Fasnacht – e Gschängg, das wird aim gäh,
die löh mer ys vo [REDACTED] wägg näh!
Wenn Fasnacht numme alli mieche,
no gubt s vyyl weniger [REDACTED] [REDACTED].

*Für Risigge und Näbewirggige
Froog Dy Doggder FMH oder Dy Dumpeter
Und liis dr Zeedel!*

Me bsuecht sällbverständligg d Ladärneusstellig uff em Münsterplatz!